

leur imprimer dans l'esprit la crainte de Dieu, & à engendrer Iefus-Christ dans l'ame de ceux qui ne l'auoiēt pas encore receu dans les eaux du Baptesme. Il a baptisé quarante personnes dans le peu de temps qu'il a esté à Tadouffac. Les meres apportent elles mesmes leurs enfans, & si quelque fauage arriue de quelque endroit plus esloigné, les femmes plus deuotes prennent garde s'il n'y a point dans la troupe quelques enfans qui ne soient pas encore baptisez, afin d'en donner aduis au Pere. Quelques-vns d'entre eux ne scauroient souffrir qu'on laisse vn enfant sans baptesme, tant ils ont peur qu'ils ne meurent sans [236] ce Sacremēt: d'autres disēt par vne charité erronée, qu'il ne se faut pas haster, que ces enfans ferōt peut-estre méchās, & que Dieu se fâchera qu'on leur ait dōné le baptesme. Ils adioūtēt que leurs parens n'estants point Chrestiens feront peut-estre des superstitions, & commettront des crimes qui causeront la mort à leurs enfans, & puis on accusera le baptesme, on criera que la Foy tuē les hōmes, & que la priere est mauuaise. Le Pere les appaissa aisément, leur faisant voir la grāde necessité de ce bain celeste.

Toutes les personnes adultes qui ont esté purifiées dās ces eaux salutaires ont receu vne pleine instruction, elles ont tesmoigné de grands desirs de viure conformément aux loix de Iefus-Christ & de son Eglise. On n'accorde pas ce Sacrement de salut & de lumiere à tous ceux qui le demandent. Il y a trois ans qu'vn certain iongleur presse qu'on le baptise, il scait toutes les prieres, il a connoissance des principaux articles de nostre croyance, il est venu depuis peu à sainct Ioseph pour se lier avec les princi-